

康對山先生集

康對山先生集卷之三十二

序

橫渠先生經學理窟序

此吾橫渠夫子之微言而門人之所記也故曰經學理窟若以爲衆理之所聚其淵若窟而出無窮也予嘗細玩其辭說其於天下之理若指黑白而較堅脆言不虛越而理皆深造見之於行事無弗達矣宋儒言治要之躬行鮮而粉飾麗若夫子蓋周孔之後一人而已予友陝西按察副使山陰成君質夫昨守鳳翔以郡爲夫子之里思欲表章其道會巡撫都御史

灊江王公汝溫行部至郡而分守叅政石岡蔡君承之具陳橫渠祠堂敝陋弗蠲請公更事脩擴以表後觀公欣然從之遂以其事下蔡君及分巡僉事王君濟川與成君成之既而又曰廟貌者一方所仰而著述萬世所賴也東西銘正蒙語錄世或盛傳而經學理窟與文集經說雖士大夫亦希覩矣曷求而刻之廣厥視乎石岡君曰某幸有經學理窟可以騰繕於是出以示成君刻之既成成君以書來屬海亭諸其首蓋以識刻時事使後人知所自始云耳而夫子之言讀者當自得之繇宋至於今學士大夫所論要不

可勝道苟微實究其所以而曰能知夫子之爲道亦
道聽途說者耳豈所以自通於夫子之門牆哉君子
弗取也

送東谷序

東谷子由崑山改蓋屋居蓋屋者三年乃以考績上
京師過予爲別又十三日往餞東谷子於思政之軒
覩近邇徃慨然興懷焉於是賦詩悲歌以贈東谷子
詩成遂序以書之於卷嗟夫士於夷居莫不以天下
之道是是非非謂如契以要貸也然而天下之事
恒出於精神思慮之外蓋有是矣而或非非矣而或

是者於是聖人之道不能信於天下而姦詐之徒為其所不當為獲其所不當獲者徃徃而是故小人亂君子夷狄侵中國遂使士大夫之口善者不知是惡者不知非聖如周公孔子而處士橫議蒙疑於當時此其故豈一日之漸哉關中郡縣之吏崇庶耻遵德義者一二人徃徃憎於多口而貪饕僥倖之徒反冒薦牒此非獨當塗者之過習而不察居而不疑由弘治之季大抵然也東谷子以名進士出宰兩劇縣不幸而當其流俗志貞操潔而上弗知民安治興而譽弗逮歷在十年而貧蹇憂否不得推餘於僕毀愈積而操愈

固行愈也而心愈僻由是則豈但可以首先關中之
吏雖之天下可也易曰履險而亨不喪七鬯東谷子
由吳抵秦關數千里而所遺植若合符節乃能獨以
無垢是居毀譽憂患脊至乎前畧無少動其心由是
雖古之人亦已難也今士大夫并古人之難為者而
責中人之才乃其所予又因喜怒而重違其本指由
是雖周公孔子立乎其前未有不非之者此其意非
真非周公孔子者苟其名非且與丘則雖百周公孔
子無非可非者也予有別業在彭麓雜聞于民博考
其政親見其為人而有美不諱抱器罔售其過安歸

耶東谷子行矣然天下之廣士大夫之多無有深知
東谷如予與漢陂石岡東巖涇野太微者况東谷非
求人之知而為是者求人之知而為是則別有所為
而不為乎此矣知不知豈東谷之志哉其詩曰惻惻
遠行邁悠悠勞我心君子當路岐握手揚清音子實
素心者棲遲良可欽世情重雷同薄俗鮮規箴今日
送子去遙望南山岑南山秋風發志士意恒苦君如天上
鴻我若道旁杜不能久踟躕徒使情縷縷君行已十
月君還應及春大道直如弦我心難重陳昌朝惜賢
達君子念經綸願申宿昔意並寸主隆斯民

東谷子草堂詩序

王子明叔揭其堂曰東谷草堂士大夫有記有賦有歌予雖不能坐其堂履其盛然讀其所謂記與賦詩與歌者則東谷已固畧無所遺矣於是明叔以序屬予究其名堂之義乃一循諸近代緣名以立字緣字以定號是亦所以借視乎名堂之義而因以致其丁寧之意而已夫名者實之賓也於理也德剛而陽柔而陰而明叔之暘蓋近積其易見而因著其無窮云爾何也暘日也天地之體如此其大且遠而其運如此其無窮非暘之爲德則息而不長而以暘與爲之麗

則暘又陽之精者故其光輝隨運而廣無有弗至乃其究使萬物各得乎遂而無遺故字王子曰明叔者章暘之德也暘之德明而其用使萬物各得乎明遂而無遺其義若已盡矣而猶以東谷識之明暘之方升而昧者融止者進作而愈光久而彌大其意若謙而其實則又要諸其本有始有卒之道也周公於乾之初九潛龍勿用辟之於暘方居重淵者也九二之在田則光漸於谷天下獲覩其文明矣故曰利見大人惟有文明之德故天下之人皆利見也明叔之東谷其義豈不亦猶九二之在田耶今明叔登仕版躋

顯順遭遇堯舜之君以行其所志逆不泥順不豫夷
險靡黷毀譽弗侵其剛健之德又合於乾往而不息
守而不易則又自強不息之義也於乎陽剛者天之
德而君子之道也明叔慎哉君子之道惟無垢故尊
無息故明士大夫之詩若文旣皆言其意而達其德
矣予斯言實所以申士大夫之意焉耳所願明叔益
富乎其所以爲明者以旁照於斯世上而君下而民
近而天下遠而後世一被是明而不窮焉則東谷之
稱將與天地日月並峙而立矣豈非君子之至願哉
明叔曰予不佞予感矣終身從事無斁矣然而烏可

云爾已也于是書之以爲東谷子草堂詩序

太子少保右都御史彭公平蜀詩序

自己巳以來蜀民不鈐方土罔靖

天子震怒爰命討平川漢之間士馬填益財殫民困
賊勢益延一時受命之臣瘁精竭思文武咸致撲之
不滅隨撫隨叛於是

上命太子少保右都御史彭公往終厥勲蓋是時公
已悉平山東中山河南之賊遂督所故將軍鼓行來
蜀乃於二月辛丑發兵保寧群盜方叛走漢綿勢熾
揚熾人心疑畏將謀內誑公曰此若擣鼠宜先塞其

旁穴夫旁穴苟塞何所不擣自三月壬申至於丁丑
所誅獲者萬有千計蜀方用寧川漢咸乂巡撫陝西
都御史藍公屬予序以賀公夫以精不以多以律不
以寬二者兵事之軌道也予曩聞征蜀將士言蜀中
多巉山絕壁賊更善附山攀壁千人刺矛激弩萬夫
莫能當也地多草樹窳凹師弗習徃徃中其伏兵平
衍之野又多稻塍水堰騎不可馳步不得奮一相躋
倚仆跌宕崩加之地氣卑濕餉飼不飽士馬忽已大
半物故倉皇用騎馬百不能選一此語實矣然是時
士亦多首功者豈設機應變不善哉或失其軌道耳

來之道既絕又分職專使糧糗常繼師得宿飽諸餘紀律之事益申嚴擊者不取取者不擊竒自為竒正自為正鋒鏑相錯毋有易也夫持是以往雖天下可也豈但蜀方哉公英爽桓毅之氣加以脩涵有素宜能先覺乎此事功之成捷於影響固非偶然也藍公與公同事共勲能喜談樂道如此要豈其私好哉為祝之曰願公凱還後以所得於蜀者上於

天子細求所以安而鎮之之道使蜀之父兄黔首如曩時各得保其屋廬田畛死不為盜則公之德於蜀

者不但萬萬世也公以爲何如哉

送東岡子序

皇上闡化厚邦勵精天下之事日日求所以安定天下之道乃莫若屏逐詭遇登崇俊良於是吏部以湖廣按察使員

上聞

上遂以東岡子往迎厥勲

命書至矣東岡子方以執事在隴西留滯數月始得歸省署戒行事歸時時因過許西康子之廬與之飲食而別於是康子謂東岡子曰予昔聞諸父師夫堅

者不可磨而磷白者不可涅而緇也公抱德履正凡所阨尼者莫能奪也是天豈無意於斯人俾公戎疾不殄如此哉天之生斯人也欲致所以厚之之道故既有賢聖之君以主之於上而又必有明哲匡隸之臣以任之於下故治定功成民厚俗美也歲自丁卯以來權臣以刑威持國天下沸然不能安幸賴

天子明聖誅殛而更改之明詔累下矣而主法之吏一沿餘習以喜怒為重輕故

上雖憂勤於治而功效未彰此其故在官不守度民不信法也夫上有所為而吏以輕重渝之是示民以

無措而欲民之有措也民惡得信法而官惡得守度
刑者民命所係風俗之本也少有所不得則姦宄緣
以為利僥倖者習而見之翕然萃於放矣雖百皐不
能治一邑况天下乎故風俗日偷而禮樂不興者法
敝於下而上不知也夫湖廣三楚之區強勝之國土
廣而民雜號至難治也諸濱蜀漢之處又水旱兵燹
相仍民苦於餽餉百不能支一其風俗因而轉移者
殆何如也故上以公往隸察之夫持握者至重而維
繫者至繁也以公才德譽望之盛固可以使湖廣父
兄子弟安厚無難矣况湖廣之民今莫不惟公是望

也公其邁往哉東岡子笑而語曰此予素所計數者
吾將往矣於是次而書之以贈東岡子正德八年癸
酉秋八月十一日丙午序

張舜卿東征詩序

正德六年山東河北盜起官軍赴勦者以數萬計賊
勢益盛於是

上大怒命右都御史長洲陸公往治之仍添調遼東
宣府兩邊之兵以為之前陸公行於是以武選主事
靈夏張舜卿統宣府兵勦西路寨將某統遼東兵勦
東踞十一月中張興張旺率衆寇長清章丘鄒平高

苑壽光博興昌樂諸縣而張舜卿度賊必夜抵高麗
鎮於是伏軍貞觀鎮俟卧擊之高麗去貞觀鎮十五
里四鼓先令斬榆棗塞巷口道踈分八百人遇要害
餘兵皆遊擊約五鼓鼓躁而進賊急來犯我師盡為
榆棗所罣挂我師於衢市間奮擊斬獲不可勝數而
二賊首亦就殄絕於是舜卿下令曰賊固有脅從者
吾良民不可槩殺先降者當生於是得男女小大八
百人騾馬千數十匹龍鳳旌旂及兵仗雜器三千七
百有奇十二月壬寅賊劉六劉七齊彥名圍在平舜
卿以精兵百人與子破其圍斬獲剽賊數十人未失

一矢捷上舜卿以功進武選員外郎子為百戶縉紳
大夫聞者皆為歌詩以嘉舜卿之績命曰東征大捷
詩昨舜卿以少保右都御史彭公之奏來與平蜀其
過時出卷示予予深歎舜卿文學之士能克武有勇
如此聞齊彥明楊虎劉六劉七者巨盜大賊也方其
猖獗時老将宿謀皆唯唯甘後不敢抗一鋒舜卿能
以百人解其堅圍斯已偉矣其高麗鎮之捷張興張
旺者劉齊頡頏之盜也寇淮安立敗兵備兵擄知府
劉祥不一年集已至數千人直隸山東徐淮諸處所
過傷殘毋敢擾也舜卿一戰遂克使無子遺此非表

表然具熊羆虎豹之勇而善謀能料其孰能然哉其孰能然哉今蜀地悉定舜卿之功又不知幾何由而往任授方益大矣然盜起固有所繇其繇皆舜卿目覩而心悉者

廟堂之上寧可嘿然而不求為之所邪鄙諺曰治壞於少安病加於小瘥今日者當病痊劇之際者也失而弗治後何已乎予與舜卿同年又厚誼如兄弟故既讀其詩於其卷首又猶有是言焉正德甲戌春正月丙申序

贈楊秉衡序

夫德與位相直才與性尚比非以表物異數其道有然也故古之明君審官而辨治責法而準式其得也吾從而重之凡加秩厚爵豐食足使者皆重也其失也吾從而治之凡罷廢誅抑皆治也故明哲不以位貶德才揜性

明君不以私蓄人腐容蠱明此六者可以理天下矣夫表物異數者

天子之公柄天下之公行也俱高而峙矣有山嶽阜岡之異俱深而濺矣有江河湖海之異此非言高私于嶽言深私諸海其數異也故

明君之務在於操法而定式蓋法備而後可以責法
於下式定而後可以使下有準故先有此二者然後
因位以植才隨治而審官如此雖有僥倖詭遇之人
不能雜進而冒至此非厚刑驅遣也賢者尚一一表
辨莫失其小大況不賢邪故曰湯有天下舉伊尹不
仁者遠矣此之謂也吾友楊秉衡守漢中三年吏部
以爲浙江按察副使府察請以予言爲賀夫君之清
德明譽彼士大夫莫不知吾所以致意於君者蓋有
以窺識

皇上用賢爲治之道雖堯舜三王不復能過也彼法

式者上操以砥下也由君在漢中凡所以綜理維持
於是法是式者未嘗纖毫遺廢由

明主表物異數之道參之使君一日而三陟弗過也
況惟是哉君之在漢中也廣教化厚民人斯二者人
人之所難也又加之以兵旅饑饉餽輸予未嘗一
日少間此雖使古循吏如龔黃朱召莫能一朝居也
雖非以棲止召也行遠者未有弗自適登高者未有
弗自卑由是以往君位當益弘而負當益重
天子宵旰之上蓋已惓惓望君矣君尚念之哉

送張闇夫序

遼陽張闇夫以戶部郎中奉

勅整督關中糧儲供實三邊既逾年事幾克成會
詔至優免逋欠君遂還京師諸公先生各賦詩以贈
因屬予序諸其首簡夫諸公先生之詩所以道情惻
惕林莽於君之行何弗至矣又奚待予言予聞之先
民已然者可指而數無然者難可必而待也此其故
在識測消長逆順之道爾自孽臣專擅以來倉庾
虛

國家之用益蹇蹇而難是此不能察其已然雖嚴刑
峻法其有所窺避者皆可得而欺也夫有所窺避者

皆可得而欺則弊愈滋法愈嚴國愈空用愈歎雖百
弘羊莫能給一鎖况之天下之大乎閭夫之來也嚴
於治頑而畧於理疲故民皆欣欣然若慈母之慰已
嚴父之教成也夫事之不集者皆悍民傲姓相挺背
也官府之令下於民民承官府之孜孜然早夜震恐
惟恐其不先至耳彼悍民傲姓欲已之晚者則揚言以
訛衆使之勿來欲取以爲利者則夤緣縣官報部運
因以所徵爲奇貨二者不同同於蠹敗

國家之用劫小民之命當事者或莫知求而治之或
治而不及其真有是故頑者益頑而疲者益倦固非

國家之法弊百姓之抗玩也閹夫深知其弊而特治其最此於事何不集為教何不遠邪然又明識其當然之故所為之慶者一能合于先王之道使有所窺避者莫能肆其姦不屑於條件禁治之末其老成慎重之氣又足以副其心之所存由是道也雖天下可也何啻關中邪夫錢穀之事我

國家自

祖宗以來付之司農者其道蓋可見也後世行法理事之臣往往作聰明亂成憲洗垢索瘢於民以倖求高髡之名浮薄者從而效之熙然成俗故賦日嚴用

日歟民日病不可支久而弗變則病者且死矣不特
賈生之癰疽耳閻夫歸見於

上庶幾以所見所行者縷陳於前使盡復

祖宗之舊貪婪窺俟之人莫能冀用其志則又閻夫
之成事也閻夫勉哉天下之民今以望閻夫矣

奉贈太子太保兼都察院左都御史彭公還

朝序

太子太保兼都察院左都御史彭公既再平蜀盜矣
又北治土魯番西郵庵奠於是

上以書徵公還朝北過省會陝西鎮巡諸公暨藩臬

諸君子走使來屬予序以贈公謂予知公深凡所以
欲致意於公者或能言之夫崧高之作吉甫斯堪江
漢之詩周邦惟賴公之崇勲休烈有耳目者所能言
也至於要成功泝源始則有道者或昧而莫宣海何
以當之哉布政使李公者以書責海曰公負蓋世之
勲當

上所禮重此丈夫得志君子道長之秋也諸公云贈
者當以文為貴而儀物不與焉其云文者當以予之
言為貴而他人不與焉夫談美德章國休君子之事
儒者所貴也予奚可辭哉於是海即諸公先生之意

以獻之公曰

明興百五十載仁漸義摩天地所履載日月所照臨
罔不尊親愛戴此商周所徯難漢唐所無有傳記所
稽不可誣也

陛下承太平之統襲治安之後人康物阜何有弗施
宜民趨義嚮教彰至仁之澤廣大治之緒乃弄兵起
教侮順抗恩方其橫時殫驍將掠名城倏忽千里捷
於疾颺此與夷狄何異

上既累詔優撫宜亟首自敷匍匐擗覬萬幸以從
德心而猶性恃冥昧致底天罰兇魁既盡黨與靡遺

使

陛下隆神武之名公卿闡戡定之勩血流千里士憊數年此豈

陛下初意哉故蠻夷雖至無狀猶有可諉曰此王者所不治地遠俗異也民亦乃爾固非冠帶文物之地於化反乎不及夫久張之絃必更久佚之民難令此長老素論也鄙諺曰操火者可以喻熱握水者可以契冷言事以躬見為得也保佐之位輅轄之地

上意必欲公與共理此正一亂一治之際其更絃施令之道微公將誰圖哉盜起於民瘼而吏不檢風俗

繇於法弛而臯不當夷狄生於內治踈而外守疲三者當塗之人所畧而不論也夫瘠民不能以自給常役尚無以用而使無所不役安不為盜吏之能者務以羅織求臯掠民無所遺不才者養姦長惡二者雖不同同於驅民此無他法弛於上而下解體也夫法弛則維常弗張教化沮廢雖使百仲尼日詣民而導之善弗能也下皆體則見上所令玩而不從少被督責反因為怨故訛言興正理盪桀民自帥其鄉國度不習於下苟以先王之道加之譬之沃膏然鐵母能灼也故

上雖宵旰憂勞與公卿百執事瘁志畢慮而功祥弗臻蓋意亡素定而行失其所先也民者以吏爲視聽者也吏如此民將焉循公竒勲宏勩天下婦人小子莫不跂而望之海承諸公之請安得不以斯言告公爲

陛下得人與天下生民賀夫行百里者不以九十里而跲言必至也况公之已行將遂足其百里哉

贈都察院右副都御史李公往治甘肅序

正德十年七月己丑甘肅開闢都御史巡撫

上以陝西左布政使高崇谷李公爲都察院右副都御

史巡撫甘肅地方

璽書既至公於是秉節北行三司諸公咸欲有以贈公而右布政王公左叅政柳公謂予與公厚宜予爲言予惟公在陝西最久由僉事副使數年始移湖廣湖廣才二年則又來陝凡陝西吏民所苦樂雖纖細知也今百姓聞公往甘肅恨不能留公乃不知

上意所在行將欲公徧澤天下予安敢不盡鄙人之詞昔公初來陝西予方以憂家居當時瘁瘁感感不能交賓客顧心獨欲見公以在京師士大夫間獨公所爲爲難知之深慕之厚也然何嘗待數言即卒能

信公爲長者可以大受此宜與執契孰謬夫事非難
成能喻者少耳甘肅之人所不能自聊幾六七載鄉
非

天子厚福所庇今安能復有室廬之托父子之愛哉
執事者不以德御下以庶立威諸將一切優遊自玩致
虜數梗邊者此非庸無狀也夫內治弛縱不嚴敵所
必乘也王吏狂悖謬妄下所難令也昨彭濟物微趙克
正克易前人之愆以爲之賢則濟物雖至今留可也
故曰以道若危易以淫居安難此非但可以深中其
情當塗之人所藹世不易者也予嘗由載籍所見心

竊自痛恨以為士無事謂人不已知不能為時所用
以濟天下之艱及用之弗效以往徃托世文罪以摧
患於人此無他志非求實學非求已耳曩公與予
言即不甚高遠而指趣悉盡夷考其已事則磊磊
然不可得而企確然不可易也幸當諸公之請可畧言
之以見公之所採明予與公所由厚非比也

孝廟時何鼎事詰問言者當時大臣蒙被禮重者
無以言也而公以儀制至事抗疏上論至有鼎近臣直
言之禍如此況疎遠乎科道言官不得其言如此況
非言官與

上嘉納焉後有旨起延壽塔公又抗疏止之其論剴切明著可與佛骨表爭高下

上初嗣位公請慎法

先皇以光丕緒叙述

先皇憂勤天下之意與孜孜圖治之心甚有次第小王子上書以六千人入貢書辭悖謾公乞返所上書責其不敬之罪令既伏悞然後許更所上書待議其人數定允然後宥

朝後卒如公議此四者志與學一不可廢也故公在武選目能箴視權姦抗拒傳奉鼎鑊之威不能脅蜂

萬之毒不能螫者公有此道也夫本者末之所資志者事之所待也由公之已然以望其所未至吾於公知綽然有餘矣茲予將日望之

送瀟川子序

瀟川子既有浙江憲使之命於是與瀟川子遊者咸思所以贈瀟川子茲以詞賦或以文學彬彬然郁郁然有老宿之所未見也夫於瀟川子之行不亦盛乎康子曰縷乎休哉可以言盛矣未可以言道也道者履之所及士之所志者也於人以言而不及乎道芬章繪什奚補焉抉竒窮瑰奚傳焉後溢泛浩宏博偉

大矣關焉夫瀟川子有道之士也工人之贈也以器
賈人之贈也以寶士大夫之贈也以言言而弗及于
道猶無言也夫欲贈瀟川子何若以道而贈乎夫士
之生也莫不挾恃所抱以睥睨於世謂可以光明俊
偉物無不及焉其行之也千百不可一二謂其志之
皆非邪此幾於誣士謂其學之皆非邪此謂之抗越
弗達於教然而君子賤焉者以其中不足而外有餘
也以其亂是而遂非也以其恢恢闊闊竊其義而資
其名也故其名雖賢也如所弗聞焉其行雖利也如
所弗有焉此非所以語道者也何若以瀟川子履之

所及者語之乎昔瀟川子其黜而田里也優遊先王之道若將終身故窮居不損焉在臺察也棄人之所易而尚其難故國是以章焉其守府也畧人之所喜爲而先其畏故民生以休焉按察也植善其狂亟亟然以行於其所聞是非之際生死旣難無悔也故於士之守也有大業焉夫往者今之監也志者行之基也瀟川子之於浙江何若一視於所故履而毋以易乎夫長憲者民命風俗之本也惟有所弗庸焉故上疑而下不畏民日就於刑戮不可以遷善而敏德此非官有所不能也治弗以事而行弗以理也朝作而

夕更加乎其弱而不校乎其強此謂治弗以事以神
縮諛訐而嘉教以順旨廢實而滋憤此謂行弗以理
二者寃民所以結恨於塗而上弗知者也夫寃民結
恨於塗而兇人肆縱志意此非

國家之福也故愚俗亂獄而固姦小人逃刑而放寇
天下之民惴惴焉被躋於齊人故無恠乎治日常少
而亂日常多也唯有道者深知其必然故因心以砥
物叅聽以廣情果斷以杜妄執準以正欵力不加多
而效長焉辟不加衆而化行焉舜之於四兇孔子之
於正邪是也然則滿川子以爲何如或曰天下之人

莫不引頸以望瀟川子使之輔弼

天子以廣雍熙之治而子以是言之此但以及刑憲
禁令之事奚足謂道以贈瀟川子以道者曰流水之
為物也不盈科不行不足於此而通於彼吾未見有
行焉者也吾聞之也君子之言也不舍其近而踰其
遠由是而之也雖天下可指掌而治也奚謂弗可以
贈瀟川子

送沈仁夫序

沈子在關中也凡五年故沈子能數過予予於是則
能有以熟知沈子之為人茲沈子秩使憲滇南矣沈

子以書抵予為別予以疾痺不能錢沈子也乃以其
意告沈子而贈之曰夫騏驥驥騄所以稱良馬者以
其德足以致遠也士大夫所以稱有良治者以其業之
居諸身者廣大而堅固也今天下之民所以困踣愁
苦不能休息者

天子嘗以蘇息安妥申飭有司使亟行之而此日甚
也固征賦之令未善邪何行之百五十年而獨至此
棘也夫由近之所行而不易雖悉蠲征賦之令而民
當益窮何也禁令不明刑罰不當奸吏舞文而欺罔
豪民倚重而噬弱故貧者抑志委心甘為人役而鉤

利之徒洋洋然橫行於下而無忌也昔者沈子之在
關內蓋嘗求是而治之矣既而何子道亨又惟求是
而治二子之治才一年而關內之民瘠如縷臬上吏
虐恢鮮實苟務姑息忽經制畧肯綮民安不然故愚
嘗以爲教化之道在於富民裕才富民裕才之道在
於明法禁審罪當刑法禁明罪審刑當矣禮樂有不
與者吾未之見也曩於何子之行也既嘗以是告之
知何子居乎其業者廣大堅固可以行之而無蹟也
故於沈子之行也又縷陳不繁焉沈子何子其道一
而已矣夫久通之市必媮久張之絃必韞皆不俟洗

民之訓而後知者也奸吏豪民之治不嚴徒以區區小過細事詰審劇切非所以求之法治之外者也今之言者曰貴近科擾官吏疾首苦心而莫能拒其至大者然止一索而止姦吏則緣是以趨五倍之利豪民乘以先輯速報者又輟轉藉倚是以什而供一也彼貴近者固莫能遽已矣此緣貴近旣民者吾亦不能已邪孔子之仕魯也魯人獵較孔子亦獵較而孔子先簿正祭器此所以使自廢其獵較之道也奸吏豪民無所得志於下彼貴近即甚很無厭見求之難如此不俟再求而心已勸矣此姑舉一事以告沈子耳

沈子愛民信法崇德敦義關中來仕者吾微有多見也民聆聆于上之治已也今已數歲無驗矣予不於沈子望而誰望邪

都察院右副都御史馬公平蜀詩序

正德辛未今右副都御史馬公以僉事分巡川南時監鄆諸賊為患蜀中者已二年既伏誅後復有廖麻子起川北方四起李崖井各有衆十餘萬破瑪瑙關陷南川綦江直犯江津以窺重瀘諸軍望鋒而潰亡敢撓者都御史林公俊駐軍江津以公與副使何君有叙瀘之捷遂檄公巡川東川東諸兵爭皆以屬之

曰賊非君莫可平也公於是與何君約曰副使李君以施南兵阨綦江路吾宜躡而感之大垵與爲夾擊此至計也於是俘斬萬餘人賊懼走乃追諸永澄槽東鄉埧搥櫓箐益斬獲不可勝紀於是賊日夜竄毋敢反顧自蹂踐死者若積薪刈泉用兵以來此大創耳然時山踞巖嶮饋餉弗繼冰雪凝沍而又士凍餒不可支公自徒步衢嶮勞苦慰勉故士人之感悅用命如此賊渡江北川湖土兵以久役思歸林公召諸公急還徵兵公獨以民兵數千襲賊後賊攻梁山關新寧公趨保新寧賊遂遁去方四乃道亡公擊牛醺

酒犒士卒曰吾乘勝追殺彼倉卒未諳吾衆寡必急擊之可得志也衆曰唯乃進追於陶溪及鳳凰山連破之於是賊走廣利寧羗掠食而已庾麻子在漢中聞若此因內懼求撫軍中諸公信以爲然公曰此所謂急則求撫緩則復叛也吾不能以全蜀之衆受侮於賊乃縱兵追擊於清風嶺歌陽寺大破之於是方四賊爲曹甫遂來乞招而自散者已數千人川東之賊始歟小矣庾麻子益自懼於是殺曹甫以遞而公帥兵追之斬獲不可勝數賊乃渡江轉川西往來漢城都之間以危言索臨江市於是主者以我師老憊議

招益堅公極論不可唯飭兵戒士籌計攻討會臨江
市父兄輯子弟數萬人拒賊弗納賊屯新梁相持者
月餘而新梁民又欲謀變賊乃去新梁復縱橫漢州
勢延蔓不可支矣

上於是以今太子太保彭公來視師公首陳平賊之
策凡若干言彭公嘆曰不如是賊不可平也乃出潼
川梓潼會兵漢州一戰廖正黨遂空喻賊以千餘人由
間道東奔所經窮山絕谷插火若流電凡三日追兵未
嘗一及獨公所伏兵數邀之會有

詔進公右僉都御史巡撫四川屬以兵事公受命益

痛自刻責明賞罰嚴紀律原丁士卒謹要害賊遂不能
更西於是又勒兵刈馬嶺絕其東奔屬副使曹某都
指揮韓某悉以精兵更番向賊而已出高坪銅鈴歷
抵平桑觀視緩急至燒刀溪戮渠兇七人賊計窮始
有志請降遣渠魁二人赴軍門公與期四五日越二
日賊已相率來而喻某亡去旋獲斬之蜀盜悉平捷
上進公右副都御史

賜以

璽書及金帛優賞之焉夫平蜀之功予以罪在鄉里
蓋數聞焉故知馬公先後詳細如此

國家承平日久豪民貪吏得志恣肆窮人蒙被荼毒不能何故奸猾者輒起兵生亂賊又矚知兵戒弛玩又每要求招徠縉紳大夫不窺其誠偽輒亦信之故愈無所忌憚觀漢中與臨江市二事非馬公安可爲也林公觀事見信彭公納策決機非明者不能皆策書所歎者此其數豈宿貯褻定邪未幾內江人駱松祥作亂有衆至數萬有司議兵討之公曰賊初僅百人耳餘皆良民脅從未可盡戮也乃勒兵坐境上令人傳檄諭之其衆果散去遂寧奸民挾其三里之衆曠役四年矣猶弄兵山中以脅其有司公命縛渠魁

十數人餘民服役如初膚淺者當何如也茂州羗悉
衆圍城城水盡圍急公遣人喻羗以

朝廷威德且使入城授方鑿井以待圍解茂人因謂
爲馬公井云使他人當之馳奏請軍矣夫戎兵之事
聖人之所慎故學鮮傳焉馬公由書生起家有夫宿
將之所難此不可以風聲氣習槩論也易曰長子帥
師以中行也其馬公謂邪予聞渠縣有兇人嘗戕其
居民闔門死焉凡數年有司置不敢問公至悉縛治
之方匆匆理校行陣也而又明法昭禁使教道顯明
非確然長者不能陝西按察使邵君文實以四川諸

君子之書謂予曩爲史官於馬公有管鮑之義常有
言以引所爲百代奇勲詩冊之首故援其事實而私
論之焉

送王克承序

王先生方伯關中三年矣使者師生以王先生數不
理於群口謂承流宣化之臣宜莫有如王先生於是
尊禮王先生有加焉凡仕關中者及關中士大夫初
不識其指意所在皆以使者爲賢明能獨知王先生
也夫自

明興以來承流宣化之臣予於關中得二人焉高密

李承裕與王先生耳然皆直而靡撓清而靡汚孑然弗淫於俗油然弗媿於心者彼又惡足以知孰可驢乎其心報乎其譽而當乎其毀者也及其有請於王先生而不獲也則又求所以甘心焉於是又以王先生爲不可凡仕闕中者又闕中士大夫皆以使者爲不肖曰是徒以市井之心睚長者之度是卒以自狀其奸諛譎險之迹而已是亦奚益於事而奚損於王先生哉於是王先生奮然若曰我知靖恭執事私顧靡爽爾矣夫行年若吹飈奔矢也我奚可以其潔而易其穢以其安而易其危哉於是力陳其志而歸

上與大臣皆莫得而留焉於是王先生浩歌以就駕
大揖以謝客又忻然若曰田爾而耕水爾而釣吾得
返吾初服而已吾又安知所謂毀譽榮辱何物哉凡
仕關中者及關中士大夫皆曰若王先生蓋古所謂
仁人長者增之而弗崇衆之而弗卑者也彼奚以是
爲有無也於是誦說我王先生至於無窮焉而庶民
小子跣而逐號泣而後先者不可以鉅萬計潯西子
聞而嘆曰王先生所以自爲者其蠲索若是也夫豪
傑之士不以丘壑之死而輕屈於細夫况若爾哉茲
所以爲王先生者也於是次第其事以贈王先生

對山集卷之三十二

康對山先生集卷之三十三

王荆山奏議序

荆山公以兵部尚書起督三邊軍務丙戌春三月駐節固原問疾苦汰冗懦齊法令謹烽堠不踰年而士馬充斥餽餉饒裕乃人人思戰矣今年夏六月虜長驅入寇公遣將力討平之虜悉遁去蓋邇所未見也進士楊君經取公先後規畫邊務及論列時政諸疏萃彙成編題曰荆山奏議按察副使帝丘桑君汝公將遂刻棗以傳托予序諸其首夫楊君之意豈不以此皆公精神心術之流布凡今日所以建大功樹令

名者攷其夷居所論大抵然也昔公以監察御史治關內其處已行事長老見者已以公輔之器目公是時予方承乏翰林公自陝還京予數與公遊歎長老之言果能窺契盛德如此乃桑君刻此而又示予以所願見安知天下願見公之緒論者不與予同哉夫事成之於見而原於學故切中事理推之而準動之而善也從古以來聖賢如周孔未之能違焉今天子勵精於上正須老成持重之臣建明於朝都俞吁咈之餘將使天下之民與被堯舜之政至於無窮是又不但三邊氓庶之獨幸而已公以爲何如哉夫

民今固以望公矣嘉靖六年丁亥秋九月六日庚辰序

姜武功平賊序

昔予以正德戊辰歸見三數處風俗則慨嘆興懷焉曰嗟乎何至是者是必將有厚憂隱禍迤邐未艾也否則何至是者居數年乃日日異不同也曰嗟乎其厚憂隱禍且成弗遠也安得賢且才者與告語之特一與阜之力可攘也乃得巡撫都御史藍公文秀巡按御史王公子衡二子先後至焉曰是則吾所謂賢且才者也失茲不言福將焉致於是以書予二公曰

某地事十年後必有大憂事關生靈僕不敢默惟公
求倡始者數人薄治之其羣從渙然散也二公曰唯
唯乃下其事於其長其長不知旨意喧喧溷溷乃藉
是將要以為功也其衆紛然因賂以訴於他司他司
喜其重賂二公之志亦寢後八年乾州有狂人樊仲
者多貲而樂誕方士誕者皆集於其門附會仲意行
諛於仲云仲當大貴於是傳播遠近所謂三數處者
舉熙然從仲而仲遂自居不疑日召無賴男子習戰
修武來者雲集又令妖人以照水法惑之俾無畔志
洎三年陰相結聚者十數萬人廼於嘉靖乙酉秋集

黨寇乾州賴州之士大夫暨守力禦之日晡逃去走
南山結銀兵復謀北寇郡縣震動若不克生獨武功
姜侯練兵有素人得無恐報至侯下令曰仲輩皆膏
梁子徒以妖師扇惑至是其羣黨固烏合也即果南
奔礮塲必假道立節橋頭凡濱水諸村落宜據舟密
候其至共力與擊賊可悉擒明日昧爽賊果至諸村
落人執挺拒賊賊悉從涉渡逃去獲馬及器物村落以
馬來侯即以馬賞獲者曰能得賊賞更不直此於
是人人奮志思獲賊矣日中果有執賊至者得仲所
給號帖已署有偽官乃立磔於市而厚賞獲者凡涇

咸興醴愚民為賊惑者舉不敢南邁應賊賊居鐵爐
庵五六日候應不至始決意趨礦場又二日賊首悉
為于敖輩所擒無一遁者故賊黨悉平焉比賊東獻
餓醜猶曰非武功所阨不及是也於是守巡撫按諸
君子咸推功自侯上功於朝而侯之規畫誠已奇矣
武功諸耆老相率曰乾州破吾縣有禍猶緩乾州不
破賊合衆南下必先甘心於吾縣吾縣非侯勢必大
壞又安有今日者于是繪圖請序述其事於首以報
侯保全之功許西子曰伸之敗人知為敖輩設巧善獲
然發軔即軋獨不以姜武功先事治兵哉及匄匍涉

渭志灰然盡矣耆老之請殆亦有所見乎故予重之
以此令示諸田事者

奉壽遂庵先生詩序

我遂庵先生以盛德大學儀刑天下關中之人親炙
之日視天下加多焉故其感戴欣慕之情至於不能
自己非私也其所得者深故其所報也厚即先生固
靳之亦不可得矣今年冬十二月十又七日寔惟先
生初度之辰而先生之壽至是蓋七十又四矣此天
之欲壽乎

國家必先產明德之臣益之以壽考居之以穹位使

佐

明辟佑元化也吾鄉都御史靈夏馬公宗大萃關中士大夫舊遊先生之門者而語之曰吾輩所以不辱乎先人之訓能自立於天壤之間者先生之教澤也今先生之年日高而吾輩之違先生益遠七十古稀况益之以四借歲有所圖能寄壽於先生之堂其於百歲僅二十六年耳吳不敏茲有祝願之辭願與諸君同賦以致於先生諒惟諸君之意無殊於不敏也士大夫曰此正吾人欲致意而不可能者幸公有以教之於是各述其所賦之辭以輸於宗大宗大乃經冊

求善書翊日帙成顧海曰須子述序士大夫之意於
首海得之三數讀其冊矣乃作而嘆曰古今人以師
道感服天下者孔孟程朱之後逮先生絕五見爾其
他雖不可勝紀皆弗羣此五者即網繆結固君子何
取焉孟子曰以善服人者未有能服人者也以善養
人然後能服天下又曰如七十子之服孔子也諦斯
言也則士大夫所以感戴欣慕於先生者蓋得其養
者深故感戴欣慕其德者至於不能自己若是是與
七十子之服孔子奚異也今

天子勵精求治於上先生以元老左右廟堂正天下

仰沐深仁至治之日陰陽於民既厚且固神之監之方將與天同極永禪淳化區區百齡何足言也宗大曰此正不敏之微意遂命書之士大夫歌詩之前若引起其意義焉嘉靖六年丁亥冬十有一月丙子序

秦壽毅庵寇先生八十序

成化弘治之間山西有二君子曰毅庵先生裕庵先生二先生胄出榆次寇氏同時為榆次學生諸提學每試輒以二寇比之曰山西有二寇其文章行義流輩莫敢望也後裕庵登進士為大理寺副毅庵竟失意場屋應貢上太學拜定州判官以子今巡撫陝西

都御史子惇之貴兩封為應天丞當毅庵在胄監時
海季父長洲公公寔與之遊海每從事几杖殊欽先
生之名德以為非世所恒有也乃亦卒困於行大德
厚者效長行高者履泰天顧獨嗇於毅庵先生耶此
不於其身當於其子孫矣不然詩書所稱天人之際
將荒唐弗據乎已而吾友子惇登進士位顯順矣又
十八年猶子子立中解元第進士為戶部主事而孫
洋與子立同榜舉人詩書之胄大江以北曾不一二
見也天人之際豈不信哉今年先生壽當八十八月
二日則先生初度之辰也子惇迎先生與其母夫人

來關中舉觴奉壽海伏處許西實樂聞其事因以屠
蘇之酒一卣遙壽先生於子惇行臺因謂先生曰以先
生之名德兩魏將相之業唾手可致乃阨輪於初不
銖少見其抱負吾子惇既與先生致身青雲之上所
謂為上為德為下為民者悉措之行事先生之志可
謂不負矣乎裕庵不幸早卒遺其孤於先生先生撫
而育之教而善之而子立者果奮迅成立又登顯位矣先
生之於裕庵可謂不盡心矣乎世固有子賢而孫不肯者故父作子述
孔以頌周泮之溫恭勵學不日登進士過休寵則先生之孫不可謂不賢
也子淳以三品之俸養先生與夫人伉儷同老致滄隨極心滿意謂先

生之養為尋常不可也壽期既屆上自節鎮鉅公與
藩臬重臣洎關內公卿大夫莫不拜壽先生於堂先
生以康強之身穹隆之年對之罔憊固不可謂不榮
亦不可謂非福也人之能自致者行義文學爾而此
數者有一非天則不可得天之所以舉是數者胥異
之先生正先生之德能契乎天而不違也子惇篤孝
慎脩一是以若先生之志將見陰陽於民厚而天錫
於先生益無疆矣願先生懋承天休千歲逢吉因舉
爵三上先生焉先生曰願如夫子之所惠矣遂書之
以為壽先生序

送朱升之序

夫折堅斷勁剗犀剗玉無向而弗利者良劍之用也
沙汰湔濯溶鑄煅鍊精光愈新者兼金之質也故士
無炫譽當事乃奇驥無異足登塗則妙君子之節豈
可約以細人之屑見齊以鄉鄙之鄙情哉故葛藟生
於高山之上非其才有凌於梗枿松栢也犀象伏於
澶洄之淵非其體固亞於猿猱麋鹿也高下之分定
而倚托之勢殊也故觀士者不於其細而於其大亮
才者不於其明而於其隱二者所以斟酌豪俊窺識
英妙之方也然五穀顯名於秦穰子臧彊迹於威宣

二君者窺識明而斟酌當巨細靡遺隱顯不謬故俗
議不能繫浮辭不能奸也至若其思裁身於鄭武伍
負盛尸於鴟革豈其誠未達於上而議不竭其智哉
主疑而讒入故志阨行塞身死用弛也曩凌谿子提
學闢內勤勤懇懇若將一變而至於道矣加以年
則學者誦習之力豈或少讓於浮梁君哉細人倡之
衆人和之故僞者見污純者見疵使

聖天子公卿之明少虧於秦穆威宣則凌谿子安脫
於羣口也今比周成俗苟且持論非一日之積也故
私者蒙譽而愛者見拔嗚者被誣而異者遭遣彼徒

以太阿假之曹侯宏樞委之碩讓皆非其實也士大夫者公論之所繫也今異說悉出於縉紳而公論不稽於古訓是仲尼邪偽於衛而夷齊瞽昧於周之日也即有才美

上安所聞即有邪罔上安所察故志士甘心而就辱豪傑長歎以遠世者非有以馳想於下許致薄於伊周也勢既無所容而數回不可易也夫庶清修潔行能純備者孟堅所以誦李育也苟以熟觀於凌谿子則育豈復敢結駟於齊轂抗肩於周行耶然凌谿子則反之矣聞凌谿子改治滇南故予得私叙而贈之

焉此學者所共覩而當塗者所宜慎哉甲戌夏五月
序

送太復先生還信陽序

大復先生居關中四年矣今年夏六月以疾求去上
下固留不可其官屬及諸生之在正學書院者不欲
遽別於先生知予之與先生友也於是以予為言贈
先生焉夫師生之際教化之首其居至不易也近名
者先要結而後軌則昧理者崇虛飾而乏精典茲二
者其始也覩焉若親感焉若躍戀焉若不可一日去
而其究也泯泯焉興怨焉鶴鳴於九臯聲聞於天物

誠而形本實而茂自然之應不可強也上以偽劫其
下則下以詐姦其上教化興行之地持此以往將安
極哉大復先生之來吾關中也曰教化廢壞者上下
安於所習而不變也夫安於所習而不變則宜其廢
壞亡拯也可不作而新之振而起之乎於是具以科
約示以程式先之以身而董之以實行之以嚴而推
之以恕其初也疑而弗信畏而弗親而其中也幡然
而悟沛然而從曰學者之事本如是乃何者恇恇惕
惕若前日耶故泛者畢定傲者畢諸崇其實而脫其
偽先其事而後其功有若董生之論焉夫諸生欲贈

大復先生歸而予泛及其事如此畧情而弗言者蓋先生之於諸生以道而合而秉執教化之責者其理當若是也或曰賤功名而黜聲華固先生之已事今天子龍飛之始首重教化俊乂畢升而先生乃以疾行豈孔孟之訓有然乎曰出處者聖賢之大閑而先生之所慎也安有高宗為之君而說終傳巖者也蓋有疾而歸德合而出君子亦行其所無事而已矣是何以疑先生哉諸生曰乃今聞夫子之所命矣於是請次第予言贈先生焉

送陳禹學序

曹郡陳禹學為陝西按察使甫三月并州之變既上公卿議可以巡撫并肅者莫如陝西按察使於是以公為僉都御史巡撫并肅諸處

上可其奏畀以璽書頒行按察諸大夫謂予曰子於公為同年且厚宜子言贈公行予應之曰往者肅州之事非公不可為矣乃今復欲公行事可以獲并肅之守矣敢不敬承諸公先生之意哉於是即諸公先生之意以告陳公曰曩嘗聞傳記之載詳矣夫聰者聽於無聲明者見於未形言事幾之至其體恆隱而其見至難也故君子審幾逆勢貴先覺其必至而豫

致其所施是以泛應曲當鮮膠柱倉卒之患矣武公
抑戎方自洒掃庭內而遽以修爾車馬寸矢戎兵用
戒戎作用邊蠻方何也慮貴遠憂不遺近也蠻夷猾
夏獨以西北為言者其力與諸蠻夷異也制御之道
廟堂嘗憂之矣然其要在用人審爾誇者鮮實而債
事勇者乏謀而罔功儒者委靡而老師三者非疆圉
之福也漢唐之策惟充國羌虜之度庶幾能先覺豫
致者矣然虛恢之人猶以為不便施難議也則是人
豈易有而世孰能俱信也曩時肅州之變予在弘治
之末已憂之矣乃蒙

宗杜靈聖直俟於此始發之此天之所以待豪俊也夫虜所以潛度中國者凡二十餘年輕忽不習之人易以爲常養其姦豪利小貨昧大畧雖甘泉以南不失者幸也而其甚異者在耶直蠻夷蚩蠢弗乘耳故若此其所聽所見安在耶直蠻夷蚩蠢弗乘耳故廟堂之計特托之公所以憂疆圉甚熟且大也曩公以頃刻談笑定肅州之變當是時番漢千萬人之命若反手也諺曰發後乘視前行今日之事非見之審而斷之決雖穰苴淮陰不能爲也天子飛龍之物所以震懼四夷控制萬國其迅威耀

德實自其肅始故諸公先生望公特厚而予敢以謬
謬為公陳也公以為何如哉

贈少叅陳君平涼遺惠序

陝西之府地瘠薄而民貧敝者莫如平涼加以
宗室繁衍邊衝往來豈惟州若縣難府顧愈益難也
頃以王府祿米詞訟號為才守者且托事以歸吏部
推擇其員

命甫下而求罷者雖其人表表時名乃望望焉去焉
撫按蒞及其境

宗室遮道訐論揮之莫去應之弗勝而守巡又紛劇

諸務者凡民之休戚事之得失吏之減否日千萬以
萃之而祿糧之伸縮支給之曲折惟守巡焉是司由
弘治以來其克以稱是司者予寔未之前聞況加以
災沴饑饉之變與庸吏鄙夫固執欲以俄頃之際成
百世不刊之功樹安養休息之業免虜掠昏墊之苦
哉此予於少叅陳君之分守平涼重以興懷焉去歲
丁亥六月平涼城南之溺其禍之慘

國家百七十年所未有也士民莫不以築城置防堊
之官曹而知府乃獨難之惟君慨然以為已任曰往
者虜所以卒至於關者正以關無崇墉焉耳今又當

水災失茲弗理民將焉賴於是請其事總制王公巡撫寇公巡按張君刻日起工民之從之比若歸市甫及六月厥叙用成老穉懽呼婦子咸喜雖君之才識有餘而心之為民弗能自己者可因以具見矣故力犯羣議而克綏虜功亦士君子自然之効也平涼舉人楊生延美張生倌嘉君治行過予請序以代合郡士大夫庶民小子之意予重感君之能以君子之道治斯地也因遂以平涼之難治者推而言之近予自華山西歸過長安平涼

宗室以祿糧弗支唁於撫臺凡數十人寇公附髀嘆

曰安得陳君與處時君守關內平賑府東予會諸臨
潼見民之誦聲純然長者也觀寇公之言則楊生所
以致意於君者豈其私比哉御史端君者正人也道
君平涼之事以為難能則楊生之言益將有據矣

翟母太夫人王氏身後旌表詩序

吾友都察院右僉都御史翟公志南生四歲而逮育
於先公太安人辛苦備嘗以撫志南孺一室餘年
三十雖鄰里姻鄰不能識其面遠近聞者莫不以太
安人之操難能顧藉隸戎伍官曹未有以其事

上聞者迨正德戊辰志南舉進士為戶部主事會有

貶封之恩太安人被與寵光安享榮養值撫寧衛指揮陳勲具奏乞旌表以勵風俗方下禮部覈實而太安人旋卒京師部以時制死者不舉其事遂寢志南讀禮於家值人有自吳下至者出大理評事李吉乞旌其母陳氏守節奏牘刊冊與太安人事若符契此終制援例懇請於

上有命允旌宅里志南且喜且痛以為太安人平生清苦萬狀幸獲微祿以養而年不逮享僅及六旬倏爾淪逝及蒙旌表盛典又爾不克躬覩一時縉紳士大夫聞者莫不傷悼或為歌詩風詠其事卷帖盈

櫝王映金輝食憲張君履謙者志南之鄉人也數重
太安人之節以書抵關內諸公及鄉人諸君子益求
詠歌以明颺太安人之懿謂海辱知志南宜序其事
於首簡海聞太安人之德熟矣顧可以荒野辭耶當
先公之訃初至號泣之極太安人濱死亦數矣忽以
舅姑高年在堂是思遂忍死以圖終養雖在寒屢而
生事死葬物備禮盡悉無遺恨丈夫所不能而太安
人獨能之視古之人奚愧也志南言某就學時太安
人教詔之意尤極懇切每夜誦習則太安人燈下執
女事一日某長飲於所親歸晚太安人責某曰吾不

能為若母矣某固長跪請罪太安人始持某泣曰爾
父宜念也爾荒怠若此是能念爾父耶是使我無面
以見爾父於地下爾何庸焉蓋至是志南益自淬礪
以求無負太安人之教故成名亮德一時知名之士
皆莫之及者太安人之教深遠矣海惟人之成德雖
本於天資學問而其薰陶漸染之力亦不可誣也太
安人以苦節自甘終身益嚴而志南克篤孝思迪哲
於明如此又以見天之所以臨監於下者其感通昭
應之妙的有可徵又如此先公之盛德太安人既以
苦節報之是雖桴之應鼓影之應形何啻哉

聖天子以仁孝化天下尊用德性登崇俊良而志南
後以孝道節鎮大行政施化吏民寅畏感慕有韓
范之風則太安人之澤又將以及於無窮身後之褒
贈方且有加未艾也豈止於前日表章宅里之一事
邪海不佞願書以俟之

太微山人張孟獨詩集序

夫因情命思緣感而有生者詩之實也比物陳興不
期而與會者詩之道也君子所以優劣古先考論文
藝於二者參決焉孟獨與予同遊南山及韋杜邵鄭
之間凡十有餘年每有所作予輒稱善今其履益深

而辭愈達矣非有以神會是理優游斯道其何以然
哉一日孟獨過予澣西山房出所為詩十餘卷予取
而讀之若鮑謝復出沈宋再作頗幸相得之未晚也
因與區裁其體而講訂如此嗟乎 明興百七十年
詩人之生亦已多矣顧承沿元宋精典每艱忽易漢
唐超悟終鮮惟李何王邊洎徐迪功五六君子蹶起
於弘治之間而詩道始有定向繼而孟獨接武於正
德之季一時作者金石並奏斯

皇明有大雅矣於戲休哉昔先兄德瞻蓋嘗奮起於
成化之初矣顧天不假年弱冠而隕篇章雖存神化

未逮識者憾焉夫弗因于情則思無所命是不緣感而有生也故比興不明修飾無據雖盈筭積將何以觀哉以是知孟獨之詩當沛然傳世也撫臺劉公嘉猷斯集慨欲板行值予東遊華山再過杜曲太守李公裝潢見示因遂書此序諸其首而且泝我明詩道之盛由於諸子者又如此云

樊氏族譜序

陝西按察司僉事樊子少南出其家譜一帙示予凡十三篇不遠胄以誣親不撰美以欺世蓋古人之所難也昔予嘗修先人之譜失定例義以示空同子李

獻吉氏獻吉以為可觀後獻吉為李氏譜則采而用之又數年予為母氏族譜涇野子以為直質與之謂予獨無遠胄撰美之嫌如今少南所撰者焉讀之三復乃知英雄之意凡有所為則一主於是而不計其他益又為古人之所難也梅國與研岡之序道之詳矣敬題諸其首以為作譜者取法焉

邠州志序

池先生既成邠州志邠州士大夫善池先生能以事實訓於其鄉人于是刻池先生之志來武功以予為序明池先生之休光予讀之數四乃有以矚見池先

生益信池先生之為人云乃序曰予自齠髫見古昔先生之名必稽問所自以徵其生始故凡天下郡邑之記靡不究矣然要其成名若池先生之志其或庶幾乎夫子之言曰行遠必自邇也其意曰苟弗能得其邇則其遠者何可言也若池先生之志其或庶幾乎彼志此者之志曰吾由是極其詞矣厚求其修飾使吾郡吾邑由是鬼鬼然聞于時人然自其初簡人已厭射思靡矣乃又稽援上世之說至于無有紀止是以益重誣于古人皆悖謬不知道予竊傷之焉今觀池先生璞乎若無以自文也限乎若無以加說

也纍纍乎綜綜乎若無以爲視也乃其事實煥焉章焉雖惡已者何可能廢也此其可爲善道有理不惑遠矣夫志者史之餘也史者信之成也彼極其辭說後求其修飭何可以言信也正德五年庚午二月壬子序

史記序

太史公作史記百三十篇由黃帝以降訖於孝武之世傳記之所載故靡有遺矣然學者多尊師其文而莫得其書有志之士憾焉予曩遊南都觀太學之所積則年歲久遠剝蝕過半蓋自中統抵今翻刻者鮮

是以良本絕廢闕漏罔稽魚魯益繁亥豕靡擇斯固
士大夫之責耳矣於是博採旁搜十又餘年始得斯
本若獲珙璧乙亥冬將謀於梓用暢宿懷然其所有
則但紀表世傳而八書逸焉間雖補之縉紳所藏差
謬又甚脫簡彌滋於是殫心竭思繼以日月叅牴牾
冊斷擬至理頗謂苟完斯典不墜前聞自丙子八月
至此踰歲刻成咸謂當有以志所由來故輒尔漫及
匪敷微効第永茲文若夫孟堅所論龍駒所稱則自
有博雅君子折衷於聖人之道而是非得失固難以
一人之言盡萬世之議者也至於黃老之談蓋當時

所尚行已有徵非先之也其云善序事理辯而不華
質而不俚文直事核不虛美不隱惡斯可為名言實
錄矣夫列傳先夷齊而後管晏所以尊高節而賤功
名也老莊申韓至同儕焉此其意云何司馬貞思欲
續成先志乃謂靜躁不同德刑亂舛遠近乖張詞義
躊駁欲柱史與漆園同傳公子與商君並列則所以
云慘礫少恩皆原於道德之意而老子深遠者矣豈
未嘗熟讀而深思邪蓋既成一家之言又安能悉合
于衆人之意鄙諺有云閉門造車出門合輒難矣哉
難矣哉

瓊山王氏族譜序

瓊山王氏五世孫濂仕為河間東光縣學教諭考功
來京師因客見於康子曰濂得承於先人之業者自
先人有以垂之濂也吾聞之君子焉曰母廢爾祖考
祖考如為爾貽爾則母悔其爾兄弟尚爾祖考之靈
神爾既母悔厥貽况祖考之靈神故堯篤九族以昭
考也舜舉世官以延福也濂有先人之業寧不思以
永懷先人之受乎乃出其譜焉曰濂所以受之於先
人以承焉者也夫子其予乎夫廣辭以修欲其章也
因名而親重其世也濂曷以辭之不修以泯沒先人

之迹耶願夫子予焉康子曰孝不費辭以尊貴也美
不簡文以明章也王氏其有大於瓊乎夫先人之所
受孰不欲其長也所貽孰不欲其則也不及其歿身
罕有能嗣矣王氏之譜自於振祖之世振祖之子廷
器既嗣明之廷器之子濂又嗣明之匍匐然惟恐無
有君子之言使其先人之貽者不重也詩曰孝子不
匱永錫爾類此孝道之應也王氏其大於瓊乎當自
濂子之子矣濂謝曰不敏不足嗣於先人今幸夫子
以寵願告來裔使勉矣譜曰始祖助拜武畧將軍自
宋元之際來官於瓊助卒子德元嗣之德元卒子拜

珠不嗣廢為布衣拜珠之子和和之子振即廷器嚴
考謂振祖者也振祖以上皆孤弱不繁至廷器之世
數人矣子濂之世又數人子濂之子以下蔓引莫可
勝紀故王氏赫然大也

對山集卷之三十三